



13. juuli 2026

Inatsisartut suleriaasianni § 37 imm. 1 naapertorlugu Naalakkersuisunut apeqquteqaat imaattoq matumuuna saqqummiuppara.

Naalakkersuisunut apeqqutit:

- 1. Naalakkersuisut ilisimavaat, akuersisummik pigisaqartup Greenland Minerals A/S-ip 2025-mut tunngatillugu misissuinnermut pilersaarutaani nalunaarutigineqarmat akuersissuteqarfiusumi Kuannersuarni aatsitassanik akulikitsumik peqarfiusunik nutaanik nassaartoqarsimasoq – ilaatigut immikkoortoq 1.800 meterit missaannik takissusilik – tassani uranimik agguaqatigiissillugu akoqartoq uranimut inatsimmi killissarititaasup 100 ppm-ip ataaniittoq nalunaarutigineqarluni?**
 - a. Inerniliussat aalajangersimasut taakku qanoq nalilerneqarlutillu oqimaalutarneqarpat 26. juni 2026-mi aalajangiinnermi, tunngavilersuummi oqaatigineqarmat uranimut inatsimmut naapertuuttumik aatsitassarsiorfissamik nassaarnissamut periarfissaqanngitsoq?**
- 2. Sooq akuersisummik pigisaqartoq 2026-mut pilersaarutigineqartumik qillerilluni misissuinnermik ingerlatsinissamut periarfissinneqanngila, nalunaarutigineqartumik 100 ppm-ip ataaniittumik aatsitassanik akoqarnermik uppersaaniarluni, inaarutaasumik aalajangiisoqannginnerani – pingaartumik sivitsuinnissamik qinnuteqaat qaammatini qulingiluani missaani suliarineqareersimammat, suliffeqarfiulli paasissutissiissutigisaa naapertorlugu naliliinerit geologiskiusut akissuteqarfiginissaannut akunnerit 48-it kisimik periarfissinneqarsimalluni sapaatip akunneranik ataatsimik piffissaliissummik sivitsuinnissamik qinnuteqaataa itigartinneqarsimalluni?**
- 3. Ilumoorpa oqartussat 2025-mi akuersisummik pigisaqartup suliffeqarfiup misissueqqissaarnissamut pisussaaffiisa eqqartuussivimmi suliap ingerlanneqarnerata nalaani unitsikkallarneqarnissaannik siunnersuutaa itigartimmassuk?**
 - a. Qanoq ililluni suliffeqarfiup pisussaaffimminik sulii naammassinnittariaqarneranik piumasaqaat kingusinnerusukkut inerniliinnermut, tassalu misissueqqinnerup “siunertaqarunnaarsimasoq”, naapertuuppa?**
- 4. Siusinnerusukkut aatsitassarsiornermut akisussaasuusimasoq Naalakkersuisoq (Naaja H. Nathanielsen) aammalu maannakut Naalakkersuisuusoq (Múte B. Egede) apeqqutit 1–3-mi saqqummiunneqartunik ilisimasaqarsimappat?**
 - a. Taakku ingerlaavartumik paasissutissinneqartarsimappat?**
 - b. Imaluunniit suliap taassuma qanoq ililluni qaqugulu aalajangiiffigineqarnissaa aammalu suliarineqarnera pillugit aalajangiinnermi peqataatinneqarsimappat – ilanngullugit akunnerit 48-it killiliunneqarsimanerat kiisalu piffissaliussamik sivitsuinnissamik qinnuteqaatip itigartinneqarsimanera?**



- c. Imaluunniit pissutsit taakku MLSA-mi aammalu departementimi allaffissornikkut kisimik suliarineqarpat?
5. Naalakkersuisut uppersarsinnaavaat MLSA-p aammalu departementip inassuteqaataat Naalakkersuisumit akisussaasumit politikkikkut akuersissutigineqarsimanersut?
- a. Kingusinnerusukkullu misissuineq takutitsissagalarpat suliaq inatsimmik unioqqutitsisumik imaluunniit maleruagassanik atuuttunik unioqqutitsisumik suliarineqarsimasoq, tamanna Naalakkersuisumut akisussaasumut aamma/imaluunniit MLSA-mi atorfilinnut qanoq kinguneqassava?
6. Naalakkersuisut inatsisilerituunit misissuinnermik aallartitaata, uranimut inatsisip suliarineqarneranut atatillugu Inatsisartut paasissutissanik suut saqqummiunneqarsimanersut paasinarsisinniarlugu ingerlanneqartoq sumut killippa?
- a. Misissuineq unitsikkallarneqarsimappat, tamanna suna pissutigalugu pisimava, aalajangiisuorlu kinaava?
 - b. Aalajangiinnerlu qanga pisimava?
 - c. Misissuineq qaqugu aallarteqqinneqassava, qaqugulu tamanut saqqummiunneqarnissaa naatsorsuutigineqarpa?
7. Naalakkersuisut nassuiaateqarfigisinnaavaat Kuannersuit pillugu suliaq suliarineqarnera Kalaallit Nunaanni aatsitassarsiornermut annertunerusumik kinguneqarnissaa naatsorsuutigineqarneris, pingaartumillu Kujataani uranimik nalinginnaasumik peqartoqarnera eqqarsaatigalugu?
- a. Itigartitsinerup nunami aatsitassanik misissuinissamut pitsaasunik sinaakkutissanik pilersitsinerup akornutaasinnaaneranik ernumaneq, kiisalu aalajangiinnerup Kalaallit Nunaat nunatut nunanit allaneersunut aningaasaliisartunut aningaasaliiffissatut nalorninartutut isikkoqalersissinnaanerani aarlerinaat eqqarsaatigalugit, aalajangiinnerup suliffeqarfinnut allanut nunap immikkoortuani misissueqqinniartunut imaluunniit aningaasaliinissamik eqqarsaatiginnittunut nassiussaa Naalakkersuisut qanoq nalilerpaat?
 - b. Kalaallit Nunaata aatsitassarsiornermut tunngatillugu nunani tamalaani aningaasaliiffissatut tusaamaneqarneranut kingunerisassat pillugit naliliisoqarsimava?
8. Naalakkersuisut nassuiaateqarfigisinnaavaat Kuannersuit pillugu suliniummik misissueqqaarnissamut akuersissummik itigartitsinerup aningaasaqarnikkut kingunerisassai, nunap isertitaqarnikkut amigaateqarnera aammalu isertitaqarfinnik nutaanik pisariaqartitsinerat eqqarsaatigalugu?
- a. Aatsitassarsiornermik inuussutissarsiteqarfik suli salliutinneqanngippat, Naalakkersuisut naatsorsuutigaat nunap isertitaasa nutaat sumiit pissarsiarineqassasut?
 - b. Naalakkersuisut suliniummik ingerlatitseqqinnginnerup aningaasaqarnikkut qanoq akeqarsinnaanera pillugu misissueqqissaarnermik ingerlataqarsimappat –



imaluunniit taamatut misissueqqissaarnermik ingerlatsiniarpa – ilanngullugit suliffissat annaaneqartut, avammut tunisassiornermit isertitat annaaneqartut kiisalu najukkani pilersuisunut periarfissat annaaneqartut?

- 9. Naalakkersuisut Energy Transition Minerals-imik oqaloqatigiinnissamut piareersimava Kuannersuit pillugu suliniummut tunngatillugu isumaqatigiissutaasinnaasumik nassaarniarluni, akuersissummilli tamakkiisumik atorunnaarsitsineramik inerniliinissaq pinnagu?**
- a. Suliniut qanoq ittumilluunniit ingerlanneqanngippat Kujataani suliffissaqartitsinermut, aningaasaliinermit isertitaqarnermullu kingunerluutaasinnaasut eqqarsaatigalugit, Naalakkersuisut suliap inaarutaasumik naammassineqartutut isigineqarnerata sioqqullugu allanik periarfissarsionnissaq naleqartutut isigaat?**
 - b. Taamaanngippat, taava sooq taamaattumik oqaloqatigiinneq ingerlanneqassanngila, suliniut tamakkerlugu taamaatiinnarneqarnerata Kalaallit Nunaanni aningaasaqarnermut kingunerluutaasinnaasut eqqarsaatigalugit?**

(Inatsisartunut ilaasortaq Lars Poulsen, Siumut)

Tunngavilersuut:

Naalakkersuisut 26. juni 2026-mi Kuannersuarni misissueqqaarnissamut akuersissummik sivitsuinnginnissamut aalajangiinerat suliap suliarineqarneranut, aalajangiinermit geologiskiusumik tunngavimmut kiisalu politikikkut aningaasaqarnikkullu kingunerisassanut tunngatillugu arlalinnik apeqqtissaqalersitsivoq. Tamatuma peqatigisaanik misissueqqissaarnermi inernerit nutaat, suliap ingerlanera aammalu oqartussanit suliarineqarnera pillugit paasissutissanik saqqummiussisoqarsimavoq, tamakkulu erseqqinnerusumik nassuiaateqarfigineqarnissaat pisariaqartilersippaat.

Apeqqutit taakku aqqutigalugit Naalakkersuisut aalajangiinermit tunngatillugu immikkut ilisimasatigut inatsisitigullu tunngavimmut, suliami politikikkut peqataatitsinermit kiisalu aatsitassarsiornermit, aningaasaliinissamut atugassarititaasunut aammalu Kalaallit Nunaata aningaasaqarnikkut ineriartorneranut annertunerusumik kingunerisassanut Naalakkersuisut naliliinerannut nassuiaateqarnissaat kissaatigineqarpoq.

Apeqqutigineqartut ullut suliffiusut qulit iluanni akeqquneqarput.